

2 Tésáróníka

Ísu wíyómpa'a iyówana Póro moórá-waai-aataiya'iyó miyáumai-aatai maisuwéna maanááímá agaimái Tésáróníkaa-naoraa-waasi Ísuni aampa'ó

kun-kwáásífá'á agaimái tuwówana moóráwigo mátímakaiye.

¹ Kemá Póro maanáái maanáúfáífímbá agai-timúmpo ísáaro. Moóráwígon-awí'a Sáírásiye moóráwígon-awí'a Tímótiye kesé'a méraayanka'a moórá-aaí sēnaumpo ísáaro. Tésáróníkaa-naopakewi Fasi'aénkóní waási ísáaro. Maníkó kentáásifowae'a kááísamai Fasi'aénkó Ísu Káráísitiye'o kááísamaimo méraawí ísáaro.

² Maníkó kentáásifowawe Fasi'aénkó Ísu Káráísitiye'a úwoi wétuwa'nai-esarai faru uwátinkaayantafe'a inai sūne.

³ Kentáási waásisono. Ááéma Maníkón-aaisafe'a timankúnkúmba é'a káfé'a fasi'ámai Maníkóe'a kááísamai méraawe. Ááéma moórámora kentirumbá tímakaamba isa'á káfé'a kentirumbá tíma'mae'a wégowe. Miyámó wéomba mindásafeta Maníkómpá'á súwisa símae wéiyeta inaisá súndasa kawetá úne.

⁴ Ísu Káráísitini waási ontáfésa sáwí'a uwátinkesa tí'a iní'o uwátínkáamba Maníkómpá'á timankúnkúmba é'a ímbo aúwémba wentáfé'a ísámai fasi'ámai méraamba póta Maníkóní waási

moórá-mora-naopimpa'o méraanta simátimeta kentúwíta mósá makáumne.

⁵ Miyáumai fasi'ámai méraamba pósa tí'a iní'o uwátínkáamba iséta séta Maníkó arupíse-meyamba timínda póna kawetóní'a uwátinkena wégarawiyiye sune.

⁶ Maníkó arupíse úmai méraiwai sáwí'o wéuwatinkaawi sáwí-meyamba tiména

⁷ kentí umbai-tántáá'é kentáásí umbai-tántáá'ésá taí'ásiyuwainiye. Fasi'aénkó Ísu wíyómpakembo kumíndara'a wení fasi'aén-kísáú-wáásiwará'á iyaráámbó kúra'mae kumíndara'a kentí umbai-tántáá'é kentáásí umbai-tántáá'é Maníkó taí'ásiyuwenasa

⁸ Maníkómpá'ó ímbo tésamo nénka'o méraawi sáwí-meyamba tiména Fasi'aénkó Ísuni ásé-aai ímbo taawiyafíyawi sáwí-meyamba timíníye.

⁹ Miwítí sáwí-meyamba maarán-iyé. Sáwí-meyambo waé'wae'o índa-aempa'a aasiyaasi maé'mae'a íyana Fasi'aénkó aambá fáitinkainasa wenópa'a ímbo iyíyamba wení fí'ora-fasi'aemba ímba awánánááwe.

¹⁰ Minkánáá kumíndara'a wení waási wenáaisafesa timankúnkúmbo owí wenáwí'a óraa'a uwánkesa áwí'a mósá marésa aamoí ónááwe. Ísun-aai simátimewanata kem-biwíwará'á érai'e sé'a wempá'á timankúnkúmba uráamba pó'a miyá ónááwe.

¹¹ Mindásafeta kembiwí túwa'nai eta maarán-áái inaisá símae wéiyune. Maníkó wení waási-i'a uwátinkaindasafena táántena kawetóní'o uwátinkaindasafeta inaisá sune. Maníkó

fasi'aémbá timína'a kentí imáyáafinkemba kawe-kísáú maimaé iyíyantafeta inaisá sune. Maníkó fasi'aémbá timína'a wempá'á timankúnkúmba fasi'ámai iyamba pó'a kawe-kísáú maiyantafeta inaisá súndasa pó'a

¹² kembiwífimbá Fasi'aénkó Ísun-awi'a óraa'a iyana Ísu wení waási-i'a ontáféna kentúwí'a maimaéna iyíniye. Kentáásí Maníkóe Fasi'aénkó Ísuwe'a úwoi túwa'nai iyamba pó'a Fasi'aénkó Ísun-awi'o mósá maráiyantafeta inaisá sune.

2

Sáwí-kisaugombo afowái'o owín-áái.

¹ Kentáásí waásisono. Kentáásí Fasi'aénkó Ísu Káráísiti kuména kuntúwaandu uwásinkainata weséta méraanda-aaisa aforatá simátimenaumne.

² Tuwímbai sésa Fasi'aénkó Ísuni kanaamá é'a paapé uráiyemo siyáan-ai ímba óraa'-imayaa iyana tirunkó sáwí'a íno. Minááímó simátímakaawi kentí imáyáafinkena siyáa miyámó sembá Maníkó simásímakaiyewa siyáa kentáfesa aúfáífinkemba simásímakaiyewa siyáa nááfaken-aaiyewa siyáao.

³ Minkáró'-áái simátíméwa'a érai'a siyé sefáímpó'a maanááímá afora'á simátimenaumpo ísáaro. Fasi'aénkó Ísu kumínda-kanaa ímba úwoi kumínífo aifa'á sáwífa'nanka Maníkómbá tínaaemba uwámiyana sáwí-kisaugombo afowái'o uráiwai sáwí-marupa'o iyamó kámakama'o wéipa'o kumbéndawinonkaamba paapé íniye.

⁴ Tuwímbai-tantaatafesamo waásimo sésa kesí maníkón-iyé sésa mintántáákón-imáyáá

mósá wémaraambo éna aambá faiyéna séna sáwísamban-ifo keyáá óraa'a úne séna Maníkóní áamáan-daumpa'a iména karo'á séna kemá Maníkó úne síníye.

⁵ Kesé'o maéwándara'a mináái simátímakaunda ímbo tuwinkaráámbá isa'á tuwinkaráawe.

⁶ Káfé'a sáwí-kisau a fowái'o uráiwaimba aambá fáí'ankaraimba wéisaawe. Maníkó séna sáwí-kisau a fowái'o uráiwaini kanaamá wétiye sínda-kanaa miwá paápé íníye.

⁷ Káfé'a sáwísáwí-kisau a fowái'o uráiwaimba aambá tawísíyankainana paápé índara'a sáwísáwí-kisau afora'á paápé ínana

⁸ sáwí-kisau a fowái'o uráiwaiwara'a paápé ínana Fasi'aénkó Ísu sámó káinkwárá'á kuména ááma áútinkena tufuwéna wení fasi'aémbá maisuwáíníye.

⁹ Sáwí-kisau a fowái'o uráiwai paápé índara'a waántáwankoni fasi'aénkwárá'á paápé éna fí'o-fi'on-kisau ímbo awánaraan-kisau karo-kísáú wémaena

¹⁰ fí'o-fi'on-tantaatafena karo'-áái simátíminasa sáwí-meyambo waé'wae'o índa-aempa'o koméraiyan-kwaasi minááisáfésa érai'e sénááwe. Érai'-aaisafesa

ímba aamoí iyamba Maníkó sáwí-imayaagomo ta'ótokaímpinkemba faútínkáíwain-aaisafesa ímba aamoí iyamba póna Maníkó ímba kawé'-ámpá'á métinkainíye.

¹¹ Miyá-sáwí-wáásí póna minkáro'-ááisáfésa érai'e sénááwe. Miyá-sáwí-wáásí póna

Maníkó étinkainana karo'-ááígó miwí fasi'ámai ta'ótorainasa karo'-ááísáfésa érai'-aain-iye sénááwe.

¹² Miyáumai érai'-aaisafesa karo'-ááíyé sésa sáwí'o wéontafesa aamoimó iyawi sáwí-meyamba timíníye. Kemá Póro sune. Aifa'á sáwí-kisauomba afowái'o uráiwai paápé ínana Fasi'aénkó Ísu kuména tufuwéna wení fasi'aémbá maisuwáíníye.

Fasi'ámaimo méraan-ai.

¹³ Kentáásí waásisono. Fasi'aénkó arumbá wétimiye. Aifa'á Maníkó kembiwísáféna séné sáwí-imayaagomo ta'ótokaimpinkemba faútinke'a kawel'-ámpá'á métinkanaumne séné wení Ufaen-ámútámbá ai'marówana Manikóní waási-i'a kunuwátinkowa'a érai'-aaisafe'a timankunkúmbo uráantafeta

aasiyaasí Maníkómpá'á súwisa sune.

¹⁴ Ásé-ai kosimátimewananasá wení waási-i'a uwátinkaina'a Fasi'aénkó Ísu Káráisiti sámó kainkwará'ó méraipa'a iméraiyantafena Maníkó táántaraiye.

¹⁵ Mindásafe'a fasi'ámai mé'a kosimátímakaunda-aiye aúfáífimbo agaiyáunda-aiye tirumpimbá ta'ótóráaro.

¹⁶ Fasi'aénkó Ísu Káráisitiye Maníkó kentáásifowawe kentáá-ímáyáá ésarai úwoi súwa'nai esarai aasiyaasí kentáá-ímáyáá kawel'á wéuwasinkaayata Ísu Káráisitiye'o méraandasafeta wéamu'maraumne.

¹⁷ Fasi'aénkó Ísu Káráisitiye Maníkó kentáásifowawe kentí imáyáá kawel'á

uwátinkesarai fasi'átinkaiyamba póna kenti kísauwe kentááye kawel'ó índasafeta inai sune.

3

Súwa'nai e'a inai serómó siyáin-ai.

¹ Kentáási waásisono. Moórá-ai simátimenaumpo ísáaro. Kentáá súwa'nai e'a Maníkómpá'á inai seró. Fasi'aénkón-ai simátiménana seyaafá'-áémpá'á minúwóiyáámbá wété ínasa minááímó ta'ótoraiyantafe'a Maníkómpá'á inai seró. Kembiwífimbá Fasi'aénkón-aiigo é'a miyán-úmai ta'ótokaiye.

² Moórá-tantaatafe'a Maníkómpá'á inai seró. Tuwímbai Maníkón-aaisafesa timankúnkúmba owasá tuwímbai karo'é wésesa miwífínkémbá sáwí-waasi sáwí-kisaumo wémaewi sínkamofainifo kentáá súwa'nai e'a Maníkómpá'á inai seró.

³ Waántáwanko ta'ótoraifo séna Fasi'aénkó wemó sintembó miyámó iwái póna káráwimai fasi'átinkainiye.

⁴ Kembiwísáféta óraaka séta Fasi'aénkóe'a kááísamai méraamba pó'a simátimunda-aaisa taawiyafé'a miyá úmae'a iyónááwe sune.

⁵ Fasi'aénkó imáyáa timína'a sé'a Maníkó arumbá wésimiye sé'a méraiylantafeta inaisá sune. Ísu Káráísiti imáyáa timína'a wemó fasi'ámaimo méraisanamo ímbo awesaraimó intembá kemá miyámó íyantafeta inaisá sune.

Kísau máéromo siyáin-ai.

⁶ Kentáási waásisono. Fasi'aénkó Ísu Káráísitini kísausa wémaundasafeta óraaka'a simátimeta séta kembiwífínkémbá tuwímbai Ísu Káráísitini

waási simátímakaunda-aaisa ímba arááiwaesa kafóná-waasiyaamba úmai méraawata séta tiyuwé'a miwísé'a ímba méraaro sùne.

⁷ Kesé'o maéwándarata kafóná-waasiyaamba ímba úmai maéwánata suwánaraamba kesáámó uráundantemba miyán-oro.

⁸ Kentí tómbá ímba úwoi nááwándasa méyánuwasuweta wéneta aafáyáara'e fenómpinka'e nó'waane siyáántán-kwiyéta kísaua wémaeta minkísáúfinkén-tóntá maiyáumne. Kembiwí nófí'a uwátinkaunafo séta tómbá síméro ímba séwándasa kisaufinken-ontantanta maiyáumne.

⁹ Maníkóní ásé-ai kosimátímakaunda-anondaa tísai úmimo tómbó maiyékaa kawé'a éta úsina ímba tísai ówándasa maiyáumne. Kísauo fasi'ámaimo maéwándasa suwáné'a kembiwíwárá'a miyá iyantafeta kosimátímakaunda-anondaa ínta úwoi maiyáumpo méyámbakaumne.

¹⁰ Kesé'o maéwándarata maarán-áái simátimeta séta kafóná-waasi kisaumo ímbo wémaen-kwaasi tómbá ímba tímérosa simátímakaumne.

¹¹ Kembiwífínkémbá tuwímbai kafóná-waasi kísau ímbo máémba tíyo-ai símae wénowata ísaraumpo

¹² miwísáféta óraaka simátimeta séta Fasi'aénkó Ísu Káráisitini kísau wémaundasafeta séta ifátuwe'a kawé'-úmai mé'a kísau wémae'a kentí kisaufinkemba tómbá naarósá sùne.

¹³ Kentáásí waásisono. Kawé-kísáú wémaemba ímba tuwesaraí ína'a miyán-káwé-kísáú máéro.

¹⁴ Maanáúfáífímbó agaimaráúnda-aaisa tuwímbai ísámai tínaaembo uwásúwéwi tuwáné'a miwítí nénka'a méwasa imáyáa ésa tiguaesáfésa ésa kouwerésa teró.

¹⁵ Namuro-wáásímó ontembá miyá ímbo íyamba kentí waásimo ontembá mináái símai sáma katíméro.

¹⁶ Fasi'aénkó faru wéuwatinkaiwaini áwáun-iye. Wemá kawé-kánaáwé sáwí-kanaawe faru uwátínkámaena iyíndasafe'a inai sune. Kem-biwísé'a Fasi'aénkó méraíndasafe'a inai sune.

¹⁷ Ayáiyá'a

kemá Póro agaimaráúmpo toráumai awáné'a wenayáánaufi'an-ifo wenááin-iye sé'a ísáaro.

Seyaafá'-áúfáífímbá miyáumai wéagaumne.

¹⁸ Fasi'aénkó Ísu Káraísiti úwoi wétuwa'nai-intafe'a inai sune.

Kemá Póro súnda-aai taí'áiyé.

Aú-aaí símai kááísamakain-aaí
The New Testament in the Awiyaana language of
Papua New Guinea
Nupela Testamen long tokples Awiyaana

copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

PDF generated using Haiola and XeLaTeX on 18 Mar 2025 from source files dated 31 Aug 2023

0dda5aa4-c019-59cf-b9ee-e1fd4762d49c